



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu 2014
Tribunál Distritál Suai
Maiu 2014

**Sumáriu prosesu julgamentu kazu iha Tribunál Distritál Suai -
períodu Maiu 2014**

Intródusaun

Iha fulan Maiu 2014, JSMP monitoriza kazu 18 iha Tribunál Distritál Suai (TDS), hosi total kazu 41 ne'ebé julga tribunál refere. Kazu hirak ne'e hotu-hotu ho natureza krime. Ne'e inklui kazu sira ne'ebé observa liuhosi tribunál movel sira iha distritu.

Kazu sira ne'e kompostu hosi krime pasajen ba moeda 1, ofensa ba integridade fízika simples 1, koasaun seksuaál 2, furtu agravadu 2, ofensa ba integridade fízika simples ho natureza violénsia doméstika 6, omisídiu negligente 2, burla agravadu no falsifikasaun dokumentus 1, violasaun seksuaál 2 no danu agravadu 1.

Hosi total kazu 18 ne'e, kazu 11 mak JSMP monitoriza liuhosi julgamentu movel ne'ebé iha Distritu Bobonaro. Julgamentu movel ne'e hala'o durante loron tolu (28-30 Maiu 2014) no JSMP so konsege observa kazu 11 hosi total 42 ne'ebé julga paralelu liuhosi tribunál movel iha distritu refere. Detaillu kona-ba julgamentu movel ne'e bele hare iha komunikadu imprensa JSMP edisaun 03 Juñu 2014, ho titlu; Tribunál Distritál Suai julga kazu violénsia doméstika 21 hosi kazu 42 liuhosi Tribunál Movel iha Distritu Bobonaro (www.jsmp.tl).

Husi total kazu hirak ne'e, iha kazu 13 mak tribunál konklui ona nia prosesu no kazu 5 mak sei kontinua prosesu. Kazu sira ne'ebé mak tribunál konklui nia prosesu, iha kazu 6 involve tipu krime ofensa ba integridade fízika simples ho natureza violénsia doméstika. Kazu 6 ne'e, tribunál konklui ho suspensaun ba pena prizaun 5 no kazu 1 konklui ho pena admoestasaun.

Tuir mai deskrisaun sumariu julgamentu kazu kompletu :

1. Kazu krime pasajen ba moeda falsa - Nú. Prosesu : 94/pen/2013/TDS

Kompozisaun Tribunál : Koletivu

Juis : Dr. Costáncio Barros Basmery, Dr. Argentino Luisa Nunes, Dra. Florencia Freitas
Ministériu Públiku : Dra. Benvinda da Costa Rosario
Defeza : Dr. João Henrique de Carvalho
Konkluzau : Adia tanba arguidu la marka prezensa

Iha 07 Maiu 2014, Tribunál Distritál Suai marka agenda hodi hala'o prosesu julgamentu ba kazu krime pasajen ba moeda ne'ebé involve arguidu JMR no FM hasoru lezada AVFR, ne'ebé akontese iha Distritu Bobonaro.

Maske nune'e, prosesu julgamentu tenki adia tanba arguidu sira ne'ebé notifikadu la marka prezensa iha tribunál. Tanba ne'e, tribunál marka fali prosesu julgamentu ba iha 24 Setembru 2014, tuku 10:00 dader.

2. Kazu krime ofensa ba integridade física simples - Nú. Prosesu : 08/pen/2013/TDS

Kompozisaun Tribunál : Koletivu
Juis : Dra. Florencia Freitas, Dr. Alvaro Maria Freitas, Dr. Pedro R. de Figueiredo
Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Adia tanba arguidu la marka prezensa

Iha 07 Maiu 2014, Tribunál Distritál Suai marka agenda julgamentu hodi hala'o prosesu julgamentu ba kazu ofensa ba integridade física simples ne'ebé involve arguidu AAT hasoru MG, iha Distritu Suai.

Iha kazu ne'e mos arguidu la marka prezensa, nune'e tribunál adia fali prosesu julgamentu ba kazu ne'e iha 04 Setembru 2014, tuku 02:00 lorokaraik.

3. Kazu krime koasaun seksuál - Nú. Prosesu : 181/pen/2014/TDS

Kompozisaun Tribunál : Koletivu
Juis : Dr. Pedro R. de Figueiredo, Dr. Costáncio B. Basmery, Dr. Alvaro Maria Freitas
Ministériu Públiku : Dra. Benvinda da Costa Rosario
Defeza : Dr. João Henrique de Carvalho
Konkluzau : Kondena ho pena prizaun tinan 3 suspende ba tinan 3 no selu kustas judisial US\$20,00

Iha 14 Maiu 2014, Tribunál Distritál Suai hala'o prosesu julgamentu ba kazu koasaun seksuál ne'ebé involve arguidu AT hasoru lezada ABM. Kazu ne'e akontese iha 28 Maiu 2012, iha Distritu Manufahi.

Ministériu Públiku akuza katak iha 28 Maiu 2012, arguidu tama ba iha lezada nia uma laran no obriga hakuak, rei no halo koasaun seksuál seluk hasoru lezada. Mesmu nune'e, arguidu la konsege halo relasaun seksuál tanba lezada hases aan/salva an hosi ataque ne'e.

Ministériu Públiku akuza arguidu kontra artigu 171 Kódigu Penál kona-ba koasaun seksuál ne'ebé nia moldura penál husi tinan 2 to'o tinan 8.

Iha prosesu produsaun ba provas, arguidu konfesa totalmente faktus no provas ne'ebé ministériu públiku akuza hasoru nia.

Nune'e mós lezada kontinua reforsa faktus sira ne'ebé hakerek ona iha akuzasaun hosi ministériu públiku nian.

Iha alegasaun finál, ministériu públiku husu ba tribunál atu kondena arguidu ho pena prizaun tinan 3 suspende ba tinan 4.

Entretantu, defeza husu ba tribunál atu aplika pena ne'ebé justu no adekua ba arguidu tanba arguidu konfesa loloos ninia hahalok ne'ebé mak nia komete hasoru lezada.

Tribunál konklui kazu ne'e hodi kondena arguidu ho pena prizaun tinan 3 suspende tinan 3 no selu kustas judisial US\$20,00.

4. Kazu krime furtu agravadu - Nú. Prosesu : 230/pen/2013/TDS

Kompozisaun Tribunál	: Koletivu
Juis	: Dr. Alvaro Maria Freitas, Dr. Costãncio B Basmery, Dr. Argentino Luisa Nunes
Ministériu Públiku	: Dra. Benvinda da Costa Rosario
Defeza	: Dr. João Henrique de Carvalho
Konkluzau	: Sei kontinua prosesu

Iha 14 Maiu 2014, Tribunál Distritál Suai hala'o julgamentu ba kazu furtu agravadu ne'ebé involve arguidu CLdJ no DGM hasoru AP, iha 19 Abril 2012, iha Distritu Suai.

Ministériu Públiku akuza katak iha 19 Abril 2012, arguidu na'in rua foti motorizada ida ho merek Honda Win iha lezadu nia armazen no lori ba rai-subar iha arguidu CLdJ nia uma laran. Ministériu Públiku akuza arguidu sira kontra artigu 252 Kódigu Penál kona-ba furtu agravadu ho moldura penal tinan 2 to'o tinan 8 iha prizaun.

Iha proses produsaun ba provas, arguidu sira konfesa totalmente faktus sira ne'e no rekoñese katak sira na'ok duni lezadu nia motorizada. Arguidu sira entrega fila fali motorizada ba lezadu depoisde polisia deskobre kazu ne'e.

Lezadu mos deklara katak motorizasa ne'ebé arguidu sira foti entrega fila fali ona ba nia.

Iha alegasaun finál, ministériu públiku husu ba tribunál atu kondena arguidu sira ho pena prizaun tinan 2 suspende ba tinan 3.

Defeza alega katak arguidu sira konfesa ba sira ninia hahalok, tanba ne'e defeza husu atu tribunál aplika pena ne'ebé justu ba arguidu na'in rua.

Depois rona tiha alegasaun hosi parte sira, tribunál marka fila fali agenda ba iha 27 Maiu 2014, tuku 10:00 dader hodi rona leitura akordaun.

5. Kazu krime ofensa ba integridade fízika simples ho natureza violénsia doméstika Nú. Prosesu : 207/pen/2013/TDS

Kompozisaun Tribunál : Singulár
Juis : Dra. Florensia Freitas
Ministériu Públiku : Dr. Antonio da Silva Tavares
Defeza : Dr. Manuel Amaral (estajiariu)
Konkluzau : Kondena pena prizaun fulan 4 suspende ba tinan 1 no selu kustus judisial US\$50,00

Iha 16 Maiu 2014, Tribunál Distritál Suai hala'o prosesu julgamentu ba arguidu BdS ne'ebé komete krime ofensa ba integridade fízika simples hasoru nia feen, iha 22 Setembru 2013, iha Distritu Suai.

Ministériu Públiku katak iha 22 Setembru 2013, arguidu lori ai-farina kain ida baku dala ida iha lezada nia ulun parte los no iha lezada nia kotuk laran, nune'e rezulta lezada sofre moras iha ulun no bubu iha kotuk laran. Kazu ne'e akontese tanba lezada lakohi ba duni karau ne'ebé han sira nia batar iha toos laran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 alineaia (b) Lei Kontra Violénsia Doméstika.

Iha prosesu audiensia julgamentu, arguidu konfesa ninia hahalok no deklarata katak nia arrepende ba ninia hahalok ne'ebé nia halo hasoru lezada.

Aleinde ne'e, lezada mós kontinua reforsa faktu sira ne'ebé deskreve ona iha akuzasaun ministériu públiku.

Iha alegasaun finál, ministériu públiku husu ba tribunál atu aplika pena ne'ebé adekuada ba arguidu tanba arguidu komete duni krime ne'ebé akuza hasoru arguidu.

Defeza konkorda ho alegasaun finál ministériu públikú tanba arguidu ho lezada nia relasaun fila fali ba hanesan normal no nunka mosu tan problema to'o agora.

Tribunál konklui prosesu ne'e no kondena arguidu ho pena prizaun fulan 4 suspende ba tinan 1. Aleinde ne'e tribunál mós aplika ba arguidu hodi selu kustus judisial US\$50,00.

6. Kazu krime omisídiu negligente – Nú. Prosesu : 54 /pen/2013/TDS

Kompozisaun Tribunál : Singulár
Juis : Dra. Florensia Freitas
Ministériu Públiku : Dr. Antonio da Silva Tavares
Defeza : Dr. João Henrique de Carvalho

Konkluzau : Sei kontinua prosesu

Iha 16 Maiu 2014, Tribunál Distritál Suai hala'o prosesu julgamentu ba kazu omisídiu negligente ne'ebé involve arguidu BBA kontra MN, iha 25 Feveireiru 2012, iha Distritu Suai.

Ministériu Públiku akuza katak iha 25 Feveireiru 2012, arguidu ho Honda Revo ida halai ho velocidade makas no soke lezadu mate kedas iha fatin akontesimentu.

Ministériu Públiku akuza arguidu kontra artigu 140 Kódigu Penál kona-ba omisídiu negligente ho moldura penal to'o tinan 4 ka pena multa.

Iha prosesu ba produsaun ba provas, arguidu rekoñese ninia hahalok no entrega ona osan hamutuk US\$6,7450 ba família matebian hodi ajuda ba serimónia funeral.

Iha alegasaun final, ministériu públiku husu ba tribunál atu kondena arguidu ho suspensaun ba pena prizaun no husu tribunál atu la bele autoriza arguidu lori motorizada durante tinan 3.

Defeza husu ba tribunál atu aplika pena ne'ebé justu no adekuaudu ba arguidu tanba arguidu konfesa nia sala no ajuda ona osan ba família matebian durante seremónia funeral ba matebian.

Depois rona tiha alegasaun final, tribunál marka fila fali ba iha 04 Juñu 2014, tuku 02:00 lorokraik hodi rona desizaun final.

7. Kazu krime burla agravadu no falsifikasaun dokumentus – Nú. Prosesu : 247/pen/2013/TDS

Kompozisaun Tribunál : Koletivu
Juis : Dr. Alvaro Maria Freitas, Dra. Florensia Freitas, no
Dr. Argentino Luisa Nunes
Ministériu Públiku : Dr. Antonio da Silva Tavares
Defeza : Dr. João H. de Carvalho
Konkluzau : Sei kontinua prosesu

Iha 22 Maiu 2014, Tribunál Distritál Suai hala'o julgamentu ba arguidu FM ne'ebé komete krime burla agravadu hasoru MMM (martires), ne'ebé akontese iha 15 Juñu 2011, iha Distritu Ainaro.

Ministériu Públiku akuza katak iha 15 Juñu 2011, arguidu uza tiha osan MMM ho montante US\$6,500,00 ba interese privadu.

Ministériu públiku akuza arguidu kontra artigu 267 Kódigu Penál kona-ba burla agravadu ne'ebé ho moldura penál tinan 3-10 iha prizaun konjugadu ho artigu 303 kona-ba falsifikasaun ba dokumentus.

Iha tribunál arguidu rekoñese ninia hahalok no prontu fo fila osan ne'ebé mak nia uza ho durasaun tempu tinan 1 fulan 6 nia laran.

Iha alegasaun finál, ministériu públiku husu ba tribunál atu kondena arguidu ho suspensaun ba prizaun no selu fila fali osan ne'ebé arguidu uza ona.

Defeza husu ba tribunál atu aplika suspensaun ba prizaun tanba arguidu hatudu komportamentu diak durante prosesu julgamentu.

Depois rona tiha alegasaun hosi parte sira, tribunál anuncia katak julgamentu ba leitura sentensa sei hala'o iha fulan Outobru 2014, através hosi julgamentu movel iha Ainaro.

8. Kazu krime ofensa ba integridade fízika simples ho violénsia doméstika - Nú. Prosesu : 88/pen/2013/TDS

Kompozisaun Tribunál	: Singulár
Juis	: Dr.Argentino Luisa Nunes
Ministériu Públiku	: Dra. Benvinda da Costa do Rosario
Defeza	: Dr. João H. de Carvalho
Konkluzaan	: Kondena ho pena admoestasaun

Iha 28 Maiu 2014, Tribunál Distritál Suai liuhosi julgamentu movel iha Distritu Bobonaro halo prosesu julgamentu ba arguidu NMdC ne'ebé komete krime ofensa ba integridade fízika simples hasoru nia feen, iha 15 Jullu 2011, iha Distritu Bobonaro.

Ministériu Públiku katak iha 15 Jullu 2011, arguidu basa dala ida iha lezada nia hasan los, tebe iha lezada nia kabas to'o monu ba iha armariu. Aktu ne'e rezulta lezada sofre moras no bubu iha isin lolon. Arguidu komete krime ne'e tanba nia HP lakon no arguidu dun lezada mak foti.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 alineaia (b) Lei Kontra Violénsia Doméstika.

Iha prosesu produsaun ba provas, arguidu konfesa totalmente ba faktus ne'ebé ministériu públiku akuza ba nia no deklara katak nia arrepende ba nia hahalok. Arguidu hatutan katak nia entrega ona osan US\$100,00 no karau ida ba lezada nia família tuir kustume timor nian. Aleinde ne'e, lezada mós konfirma faktu sira hosi akuzasaun hosi ministériu públiku.

Iha alegasaun finál, ministériu públikú husu ba tribunál atu aplika pena prizaun tinan 1 suspende ba tinan 1 tanba konsidera katak arguidu konfesa faktu sira hanesan deskreve ona iha akuzasaun hosi ministériu públiku.

Defeza husu ba tribunál atu aplika pena ne'ebé justu no adekuada ba arguidu bazeia ba sirkunstansia atenuantes sira hanesan arguidu no lezada diak malu ona to'o agora.

Depoisde avalia prosesu tomak, tribunál konklui kazu ne'e no kondena arguidu ho pena admoestasaun.

9. Kazu krime ofensa ba integridade fízika simples ho natureza violénsia doméstika - Nú. Prosesu : 77/pen/2014/TDS

Kompozisaun Tribunál : Singulár
Juis : Dr. Pedro R. De Figueiredo
Ministériu Públiku : Dra. Benvinda da Costa do Rosario
Defeza : Dr. João H de Carvalho
Konkluzau : Kondena pena prizaun tinan 1 fulan 6 suspende ba tinan 3 no selu kustas judisiál US\$15,00

Iha 28 Maiu 2014, Tribunál Distritál Suai liuhosi julgamentu movel iha Distritu Bobonaro hala'o prosesu julgamentu no kondena arguidu FdJS ho pena tinan 1 fulan 6 suspende ba tinan 3, no selu kustas judisiál US\$15,00.

Tribunál prova katak arguidu komete duni krime ofensa ba integridade fízika simples hasoru nia feen iha 08 Setembru 2013. Tribunál prova katak arguidu basa dala rua iha lezada nia hasan los, buti lezada nia kakorok no rasta lezada to'o monu ba rai.

Antes ne'e, ministériu públiku akuza katak iha 08 Setembru 2013, arguidu basa dala rua iha lezada nia hasan los, buti lezada nia kakorok no rasta lezada to'o monu ba rai. Aktu ne'e rezulta lezada sofre moras no bubu iha hasan no kakorok. Arguidu komete krime ne'e tanba lezada hatan hasoru arguidu wainhira arguidu trata aat lezada ho liafuan aat.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 alinea (b) Lei Kontra Violénsia Doméstika.

Iha prosesu produsaun ba provas, arguidu konfesa totalmente ba faktus ne'ebé hakerek iha akuzasaun ministériu públiku no deklarara mós katak nia arrepende ninia hahalok. Alende ne'e, lezada mós kontinua reforsa faktu sira iha akuzasaun ministériu públiku.

Iha alegasaun finál, ministériu públiku husu ba tribunál atu aplika pena efetiva tinan 1 iha prizaun ba arguidu tanba provadu komete duni krime ne'ebé ministériu públiku akuza ba arguidu.

Defeza husu ba tribunál atu aplika pena ne'ebé justu no adekuaudu ba arguidu tanba arguidu no lezada diak malu ona no nunka mosu problema to'o agora.

Depoisde avalia faktus no alegasaun hosi parte sira, tribunál konklui prosesu ne'e no kondena arguidu ho pena prizaun tinan 1 fulan 6 suspende ba tinan 3 inklui no selu kustas judisiáriu US\$ 15,00.

10. Kazu krime ofensa ba integridade fízika simples ho natureza violénsia doméstika - Nú. Prosesu : 74/pen/2013/TDS

Kompozisaun Tribunál : Singulár
Juis : Dr. Pedro R. De Figueiredo
Ministériu Públiku : Dra. Benvinda da Costa do Rosario
Defeza : Dr. João H de Carvalho
Konkluzau : Kondena pena prizaun tinan fulan 6 suspende ba tinan 1

Iha 28 Maiu 2014, Tribunál Distritál Suai liuhosi julgamentu movel iha Distritu Bobonaro hala'o julgamentu ba arguidu OB ne'ebé pratika krime ofensa ba integridade fízika simples hasoru nia feen iha 15 Dezembru 2013, iha Distritu Bobonaro.

Ministériu Públiku akuza katak iha 15 Dezembru 2013, arguidu tuku dala rua iha lezada nia kotuk laran no riba lezada ba rai. Aktu ne'e rezulta lezada sofre moras no bubu iha kotuk laran. Kazu ne'e akontese tanba lezada husu beibeik arguidu ninia salariu ne'ebé arguidu uza tiha hodi sosa tua. Tanba lezada husu bebeik nune'é halo arguidu nervoju hodi baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 alinea (b) Lei Kontra Violénsia Doméstika.

Iha julgamentu produsaun provas, arguidu konfesa totalmente ninia hahalok ne'ebé nia halo hasoru nia feen no deklara katak nia arpende nia hahalok. Iha parte seluk, lezada mós kontinua konfirma faktu sira ne'ebé deskvre iha akuzasaun ministeriu públiku.

Iha alegasaun finál, Ministériu Públiku husu ba tribunál atu aplika pena prizaun tinan 1 suspende tinan 1. Defeza husu ba tribunál atu aplika pena suspensaun ne'ebé justu no adekuada ba arguidu tanba arguidu ho lezada diak malu ona no moris hanesan feen ho laen to'o agora.

Tribunál konklui kazu ne'e no kondena arguidu ho pena prizaun tinan 1 fulan 6 suspende ba tinan 1.

11. Kazu krime ofensa ba integridade fízika simples ho natureza violénsia doméstika - Nú. Prosesu : 01/pen/2014/TDS

Kompozisaun Tribunál : Singulár
Juis : Dra. Florensia Freitas
Ministériu Públiku : Dra. Benvinda da Costa do Rosario
Defeza : Dr. João H de Carvalho
Konkluzau : Kondena pena prizaun tinan 1 fulan 6 suspende ba tinan 3 no selu kustas judisial US\$15,00

Iha 28 Maiu 2014, Tribunál Distritál Suai liuhosi julgamentu movel iha Distritu Bobonaro hala'o prosesu julgamentu ba arguidu DdS ne'ebé komete krime ofensa ba integridade fízika simples hasoru nia feen iha 14 Setembru 2013, iha Distritu Bobonaro.

Ministériu Públiku katak iha 14 Setembru 2013, arguidu tuku dala ida iha lezada nia tilun no dala ida iha matan no tebe dala ida iha lezada nia kotuk laran to'o lezada monu tun ba rai. Aktu ne'e rezulta lezada sofre moras no bubu iha isin lolon. Arguidu komete krime ne'e tanba lezada trata arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 alinea (b) Lei Kontra Violénsia Doméstika.

Iha prosesu julgamentu, arguidu konfesa totalmente ba faktus sira ne'ebé mak nia halo hasoru lezada nomós arrepende ba nia hahalok. Nune'e mós lezada kontinua konfirma faktu sira hosi akuzasaun ministériu públiku nian.

Iha alegasaun finál, Ministériu Públiku husu ba tribunál atu aplika pena prizaun tinan 1 suspende tinan 1 ba arguidu.

Defeza husu ba tribunál atu aplika suspensaun ba pena ne'ebé justu no adekuaudu ba arguidu tanba arguidu no lezada diak malu ona no laiha tan problema entre sira to'o agora.

Tribunál konklui prosesu ne'e no kondena arguidu ho pena prizaun fulan 6 suspende ba tinan 1. Tribunál mós kondena arguidu atu selu kustas judisial US\$15,00.

12. Kazu krime ofensa ba integridade fízika simples ho natureza violénsia doméstika Nú. Prosesu : 01/pen/2013/TDS

Kompozisaun Tribunál	: Singulár
Juis	: Dra. Florensia Freitas
Ministériu Públiku	: Dra. Benvinda da Costa do Rosario
Defeza	: Dr. João H de Carvalho
Konkluzau	: Kondena pena prizaun tinan fulan 6 suspende ba tinan 1

Iha 28 Maiu 2014, Tribunál Distritál Suai liuhosi julgamentu movel iha Distrito Bobonaro hala'o prosesu julgamentu ba arguidu MdSV ne'ebé komete krime ofensa ba integridade fízika simples hasoru nia feen, iha 14 Novembru 2013, iha Distritu Bobonaro.

Ministériu Públiku katak iha 14 Novembru 2013, arguidu ho sintu baku dala tolu iha lezada nia kotuk laran. Tanba ne'e, lezada halai sai hosi uma laran maibé arguidu duni tuir no kontinua baku dala barak iha lezada nia isin lolon. Aktu ne'e rezulta lezada sofre moras no bubu iha isin lolon. Kazu ne'e akontese tanba arguidu buka hena/roupa la hetan no husu ba lezada maibé lezada hatan katak nia mós la-hatene, tanba ne'e arguidu nervoju no baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 alinea (b) Lei Kontra Violénsia Doméstika.

Iha prosesu julgamentu, arguidu konfesa totalmente ba faktus no arrepende ba ninia hahalok. Alende ne'e, lezada kontinua konfirma faktu sira iha akuzasaun ministériu públiku nian.

Iha alegasaun final, Ministériu Puúbliku husu ba tribunál atu aplika pena prizaun 1suspense tinan 1 ba arguidu. Defeza husu ba tribunál atu aplika pena multa ba arguidu tanba arguidu ho lezada diak malu ona to’o agora.

Bazeia ba faktu sira ne’ebé produz durante julgamentu, tribunál konklui prosesu ne’e no kondena arguidu ho pena prizaun fulan 6 suspense ba tinan 1.

13. Kazu krime omisídiu negligente – Nú. Prosesu : 91/pen/2014/TDS

Kompozisaun Tribunál	: Singulár
Juis	: Dr. Pedro R.de figueiredo
Ministériu Públiku	: Dra. Benvinda da costa do Rosario
Defeza	: Dr. João Henrique de Carvalho
Konkluzau	: Kondena ho pena prizaun tinan 2 fulan 6 suspense ba tinan 3

Iha 29 Maiu 2014, Tribunál Distritál Suai liuhosi julgamentu movel iha Distritu Bobonaro hala’o prosesu julgamentu ba kazu omisídiu negligente ne’ebé involve arguidu BN hasoru lezada RdC, iha 04 Agostu 2013, iha Distritu Bobonaro.

Ministériu Públiku akuza katak iha 04 Agostu 2013, arguidu laiha karta kondusaun lori motor ida no tula mós lezada. Iha dalan arguidu la konsege kontrola motor nia travaun no halai sai hosi estrada no halai ba soke besi rin eletrisidade nian. Asidente ne’e rezulta lezada mate kedas iha fatin akontesimentu.

Ministériu Públiku akuza arguidu kontra artigu 140 Kódigu Penál kona-ba omisídiu negligente konjugadu ho artigu 207 kona-ba kondusaun sem karta kondusaun.

Iha prosesu produsaun ba provas, arguidu konfesa no rekoñese ninia hahalok no deklarata katak nia entrega ona osan hamutuk US\$4,100.00 ba família lezada hodi ajuda iha serimónia funerál ba matebian.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 maibé suspense nafatin ba tinan 1.

Defeza husu ba tribunál atu aplika suspensaun ba pena ne’ebé justu no adekudu ba arguidu tanba arguidu konfesa no rekoñese ninia hahalok.

Depois avalia faktu sira ne’ebe produs durante julgamentu no prosesu tomak ne’ebé partense ba kazu ne’e, tribunál konklui prosesu ne’e no kondena arguidu ho pena prizaun tinan 2 fulan 6 suspense ba tinan 3.

14. Kazu krime furtu agravadu - Nú. Prosesu : 29/pen/2013/TDS

Kompozisaun Tribunál	: Koletivu
----------------------	------------

Juis : Dr. Pedro R. de Figueireido, Dr. Costãncio B Basmary,
Dr. Argentino Luisa Nunes
Ministériu Públiku : Dra. Benvinda da Costa Rosario
Defeza : Dr. João Henrique de Carvalho
Konkluzau : Kondena ho pena prizaun tinan 3 suspende ba tinan 4

Iha 29 Maiu 2014, Tribunál Distritál Suai liuhosi julgamentu movel iha Distritu Bobonaro, hala'o prosesu julgamentu ba kazu furtu agravadu ne'ebé involve arguidu SG, HM, JM, FL, JGC, JB no MM hasoru Estadu. Kazu ne'e akontese iha 10 Setembru 2011, iha Distritu Bobonaro.

Ministériu Públiku akuza katak iha 10 Setembru 2011, arguidu sira taka oin metin tama ba iha kompania oli pezadu CNI 22 ne'ebe partense ba estadu nia propriedade no foti sasan konstrusaun oli pezadu nian hanesan simenti sakas 150, *besi beton* 150, tripleks tahan 50, karosa 1, besi kanu lolon 12 no kanuru suru rai 8.

Ministériu Públiku akuza arguidu sira kontra artigu 252 Kódigu Penál kona-ba furtu agravadu ne'ebé ho nia moldura penál entre tinan 2 to'o tinan 8 prizaun.

Durante julgamentu arrguidu sira konfesa no rekoñese faktu sira ne'e no deklarata katak sira arrepende sira nia hahalok. Arguidu sira mós deklarata katak sasan sira ne'ebé sira foti intrega ona ba iha Polisia Eskuadra Maliana no intrega fila fali ona ba iha kompania oli pezadu.

Iha alegasaun finál, ministériu públiku husu ba tribunál atu kondena arguidu sira ho pena suspensaun tanba arguidu sira intrega ona sasan hirak ne'ebé sira foti.

Defeza husu ba tribunál atu aplika pena ne'ebé justu no adekuaudu ba arguidu sira tanba arguidu sira konfesa no rekoñese sira nia hahalok.

Depoisode avalia faktu sira ne'e hotu, tribunál konklui prosesu ne'e no kondena arguidu sira ho pena prizaun tinan 3 suspende ba tinan 4.

15. Kazu krime koasaun seksuál - Nú. Prosesu : 10/pen/2013/TDS

Kompozisaun Tribunál : Koletivu
Juis : Dr. Pedro R de Figueireido Dra. Florensia Freitas, Dr.
Argentino Luisa Nunes
Ministériu Públiku : Dra. Benvinda da Costa Rosario
Defeza : Dr. João Henrique de Carvalho
Konkluzau : Kondena ho pena prizaun tinan 3 suspende ba tinan 4

Iha 29 Maiu 2014, Tribunál Distritál Suai liuhosi julgamentu movel iha Distritu Bobonaro hala'o prosesu julgamentu ba kazu koasaun seksuál ne'ebé involve arguidu LS hasoru JVdR. Kazu ne'e akontese iha 22 Fevereiru 2012, iha Distritu Bobonaro.

Ministériu Públiku akuza katak iha 22 Feveireiru 2012, arguidu tama ba iha lezada nia kuartu laran no halo koasaun seksuál hasoru lezada iha momentu lezada toba dukur hela. Liutiha loron rua arguidu kontinua tama ba iha lezada nia kuartu laran hodi kaer lezada nia isin lolon no rei lezada.

Ministériu Públiku akuza arguidu kontra artigu 171 Kódigu Penál kona-ba koasaun seksuál ne'ebe ho nia moldura penal tinan tinan 2 to'o tinan 8.

Iha produsaun ba provas, arguidu konfesa no rekoñese ninia hahalok no arrepende katak nia hahalok ne'e kontra lei. Arguidu mós deklarara katak problema ne'e rezolve ona tuir lisan Timor nian no arguidu intrega karau 2, belak 2, fahi 1, bir kaixa 1, bibi 1 no tais 1 ba família lezada.

Nune'e mós lezada kontinua reforsa faktu sira iha akuzasaun no deklarara mós katak arguidu intrega duni sasan hirak ne'e.

Iha alegasaun finál, ministériu públiku husu ba tribunál atu kondena arguidu ho pena prizaun tinan 3 suspende ba tinan 3.

Defeza husu ba tribunál atu aplika pena ne'ebé justu no adekuaudu ba arguidu tanba arguidu kolabora ho tribunál no konfesa lolo faktus sira ne'ebe akuza ba arguidu.

Bazei aba faktu sira ne'e hotu, tribunál konklui prosesu ne'e no kondena arguidu ho pena prizaun tinan 3 suspende ba tinan 4.

16. Kazu krime violasaun seksuál - Nú. Prosesu : 84/pen/2014/TDS

Kompozisaun Tribunál	: Koletivu
Juis	: Dr. Pedro Raposo de Feigueireido, Dra. Florensia Freitas, Dr. Argentino Luisa N.
Ministériu Públiku	: Dra. Benvinda da Costa do Rosario
Defeza	: Dr. João Henrique de Carvalho
Konkluzau	: Absolve

Iha 29 Maiu 2014, Tribunál Distritál Suai liuhosi julgamentu movel iha Distritu Bobonaro hala'o prosesu julgamentu ba kazu violasaun seksuál ne'ebé involve arguidu FdC hasoru DP. Kazu ne'e akontese iha 08 Dezembru 2013, iha Distrito Bobonaro.

Ministériu Públiku akuza katak iha 08 Dezembru 2013, maizumenus iha oras tuku 03:00 lorokraik arguidu rasta lezada ba iha haris fatin laran hodi halo relasaun seksuál ho lezada.

Ministériu Públiku akuza arguidu kontra artigu 172 Kódigu Penál kona-ba violasaun seksuál ho moldura penal tinan 5 to'o 15 prizaun.

Iha julgamentu iha tribunál arguidu nega faktu sira ne'ebé ministériu públiku akuza katak arguidu rasta lezada ba haris fatin hodi halo relasaun seksuál ho lezada. Arguidu deklarara katak

nia hakuak no rei lezada no sira nain rua iha relasaun namora. Arguidu mós deklara katak problema ne'e rejolve ona tuir sira lisan adat no nia intrega osan US\$700,00 ba família lezada.

Iha parte seluk, lezada mós konfirma katak nia ho arguidu katak arguidu iha relasaun namora. Lezada mós haktuir katak iha momentu ne'ebá arguidu la konsege halo relasaun seksuál ho nia maibé arguidu hakuak no rei deit nia.

Testemuña AdS depoimentu katak wainhira nia tama ba haris fatin nia hare ho matan arguidu ho lezada rei malu hela tanba ne'e testemuña mós sai fila fali deit no fila ba nia uma.

Iha alegasaun finál, ministériu públiku husu ba tribunál atu absolve arguidu hosi akuzasaun ministériu públiku. Defeza mós husu ba tribunál atu absolve arguidu hosi prosesu ne'e tanba akuzasaun la provadu.

Depois tribunál avalia provas hotu, tribunál konklui prosesu ne'e no absolve arguidu akuzasaun hosi ministériu públiku.

17. Kazu krime danu agravadu - Nú. Prosesu : 17/pen/2013/TDS

Kompozisaun Tribunál	: Koletivu
Juis	: Dr. Pedro R. de Figueirera, Dr. Costácio Barros Basmery no Dr. Argentino L. Nunes.
Ministériu Públiku	: Dr. Felismino Garcia Cardoso
Defeza	: Dr. João Henrique de Carvalho
Konkluzau	: Absolve

Iha 30 Maiu 2014, Tribunál Distritál Suai liuhosi julgamentu movel iha Distritu Bobonaro hala'o prosesu julgamentu ba kazu danu agravadu ne'ebé involve arguidu ASG hasoru Estadu, iha 12 Juñu 2012, iha Distritu Bobonaro.

Ministériu Públiku akuza katak iha 12 Juñu 2012, maizumenus iha oras tuku 03:00 lorokraik arguidu ba iha edifísiu administrasaun Distritu Bobonaro no trata guarda sira iha ne'ebá. Arguidu mós les avizu ne'ebé prega iha kadru laran. Kazu ne'e akontese tanba arguidu la satisfas ho rezultadu ba projetu PDD nian ne'ebé nia naran laiha/lasai.

Ministériu Públiku akuza arguidu kontra artigu 259 Kódigu Penál kona-bá danu agravadu ne'ebé nia pena husi tinan 3 to'o tinan 8 prizaun.

Iha prosesu julgamentu, arguidu deklara katak, nia la les avizu maibé dada tun deit no dokumentu hirak la nakles no bele taka fila fali. Arguidu nega katak nia trata no lees avizu, maibé nia deklara katak nia arrende ba ninia hahalok nia halo ona.

Iha alegasaun finál, ministériu publikú husu ba tribunál atu aplika pena prizaun fulan 6 suspende ba tinan 1. Entretantu parte defeza husu ba tribunál atu absolve arguidu hosi akuzasaun ministériu públiku.

Depois avalia provas hotu sira, tribunál konklui prosesu ne'e no absolve arguidu husi prosesu ne'e.

18. Kazu krime violasaun seksuál - Nú. Prosesu : 64/pen/2014/TDS

Kompozisaun Tribunál	: Koletivu
Juis	: Dr. Alvaro Maria Freitas, Dr. Pedro Raposode Feigureido, Dr. Argentino Luisa Nunes
Ministériu Públiku	: Dra. Benvinda da Costa do Rosario
Defeza	: Dr. João Henrique de Carvalho
Konkluzau	: Absolve

Iha 30 Maiu 2014, Tribunál Distritál Suai liuhosi julgamentu movel iha Distritu Bobonaro hala'o prosesu julgamentu ba kazu violasaun seksuál ne'ebé involve arguidu SVNdS hasoru NdC. Kazu ne'e akontese iha 11 Janeiro 2014, iha Distritu Bobonaro.

Ministériu Públiku akuza katak iha 11 Janeiro 2014, maizumenus iha oras tuku 12:00 meudia arguidu tula lezada ho motor ba iha lezada nia uma. Iha dalan klaran arguidu lori lezada ba iha dut laran hodi halo relasaun seksuál ho lezada.

Ministériu Públiku akuza arguidu kontra artigu 172 Kódigu Penál kona-ba krime violasaun seksuál ho moldura penal tinan 5 to'o 15 prizaun.

Iha julgamentu ba produsaun ba provas, arguidu konfesa no rekoñese katak nia halo duni relasaun seksuál ho lezada maibé la ho obrigasaun, maibé tanba hakarak ho hakarak. Arguidu mós deklara katak kazu ne'e rejolve ona tuir lisan adat ninian no arguidu intrega ona osan US\$2000,00 ba família hosi lezada.

Lezada rekoñese katak sira halo duni relasaun seksuál tanba hakarak ho hakarak. Tuir lezada arguidu la obriga nia hodi halo relasaun seksuál. Lezada mós konfesa katak nia hakarak halo relasaun ho arguidu tanba arguidu promete atu kaben ho nia.

Iha alegasaun finál, ministériu públiku husu ba tribunál atu absolve arguidu husi prosesu ne'e tanba faktus hosi akuzasaun ministériu públiku la provadu. Defeza mós husu ba tribunál atu absolve arguidu tanba arguidu la komete krime ne'e.

Bazeia ba faktu sira ne'ebéprodúz durante julgamentu, tribunál konklui prosesu ne'e no absolve arguidu husi kazu ne'e.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org

info@jsmp.minihub.org

Telephone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl